

Messadi pertuccont la revisiun parziala dalla lescha da taglia dalla vischnaunca Ilanz/Glion

Preziau signur president dil parlament
Stimadas parlamentarias, stimai parlamentararis

Tgauns cun funcziuns ed incumbensas specialas, che han ina scolaziun e certificaziun corrispudenta, ein tenor art. 13 dalla lescha da taglia communal deliberai dalla taglia sin tgauns. L'enumeraziun ei denton buca completa e duei vegnir cumplettada cun tgauns da protecziun da muntaneras, tgauns da saung, tgauns da survetsch dil corp da guardias da cunfin e dall'armada svizra. Ulteriuramein duei la caschun vegnir nezegiada per far adattaziuns en connex cun la revisiun dalla lescha cantunala pertuccont la taglia sin ierta e donaziuns. Aschia ei ina revisiun parziala dalla lescha da taglia necessaria.

Deliberaziun dalla taglia sin tgauns per tgauns da protecziun da muntaneras, tgauns da saung e tgauns da survetsch

Cun la presenza rinforzada dil luf ella Svizra e cunzun era ella Surselva, san ils purs buca far auter che prender mesiras per la protecziun da lur muntaneras. Sper mesiras da segirtad tecnicas eis ei era pusseivel da tener tgauns da protecziun da muntaneras. Cunquei che quels tgauns surveschan ad in cert nez, ch'ei era d'interess general, segiustifichescha ina deliberaziun dalla taglia sin tgauns per quels tgauns.

Ils biars tgauns ein en acziun tier muntaneras da nuorsas ni cauras, singuls tgauns era tier muntaneras da bovs. El rom da siu program naziunal per la protecziun da muntaneras promova igl Uffeci federal d'ambient (UFAM) la tratga e scolaziun da tgauns da protecziun da muntaneras ella Svizra. En quei connex ston ils tgauns vegnir scolai dad in'uniun da tratga renconuschida digl UFAM tenor las prescripziuns formuladas dalla confederaziun egl agid d'execuziun per tgauns da protecziun da muntaneras. Ils tgauns vegnan indicai sco tgauns ufficials da protecziun da muntaneras ed ein registrai sco tals digl UFAM ella banca da datas AMICUS. Cun la terminaziun dalla scolaziun ella vegliadetgna da 15 entochen 18 meins ston ils tgauns absolver cun success ina schinumnada controlla per la promptadad d'acziun per buca piarder la registraziun sco tgauns da protecziun da muntaneras ufficials.

Medemamein duein ils tgauns da saung vegnir deliberai dalla taglia sin tgauns. Tgauns da saung valan sco specialists per ils fastitgs da blessuras ed ein en acziun ell'entira Svizra en cantuns cun catscha da patenta sco era en cantuns cun catscha da revier. En quei senn ei igl engaschament da tgauns da saung ina part dil schurmetg d'animals sco era dil survetsch tier la selvaschina e per la catscha. Cunquei che tgauns ein buca mo en acziun tier la polizia tgei che pertucca la segirtad, denton era tier ils corps da guardias da cunfin ni dall'armada svizra, duein era quels tgauns da survetsch vegnir menziunai sut la lit. a. Per tut las sorts da tgauns ch'ei menziunai dalla taglia sin tgauns sut igl art. 13 al. 1, ei reglau ell'al. 2 ch'els ston esser certificai ed en acziun a moda cumprovada.

Adattaziuns formalas

Ils 12 da fevrer 2019 ha il cussegl grond approbau la revisiun parziala dalla lescha cantunala da taglia (LT) e dalla lescha davart las taglias communalas e davart las taglias da baselgia (LTCTB). Cun quella

revisiun ein las taglias sin ierta e donaziuns dil cantun e dallas vischnauncas vegnidas unificadas, cun quei ch'il cantun mida dalla taglia sin il relasch sin la taglia sin la quota d'ierta. Ultra da quei ei igl incasso dalla taglia communal en quei sectur vegnius delegaus all'administraziun cantunala da taglia. Sco consequenza da quella midada han las vischnauncas stuiu adattar lur leschas da taglia communalas. Il parlament communal ha approbau la revisiun corrispundenta a caschun dalla sesida dils 28 d'october 2020. Cun la decisiun dalla regenza dils 2 da fevrer 2021 ei la revisiun dalla lescha da taglia communal vegnida approbada cun ina resalva. La resalva pertucca la scadenza ed il termin da pagament dalla taglia sin ierta e donaziuns. Quei per quei che la taglia sin il gudogn ord la vendita da terren communal e niev la taglia sin ierta e donaziuns communal vegn taxada dil cantun. Cun la revisiun parziala presenta dils artechels corrispundents (art. 18 al. 3 ed art. 19 al. 2) duei vegnir corrispundau a quella resalva tenor la decisiun dalla regenza.

Revisiun parziala dalla lescha da taglia

Art. 13 Deliberaziun dalla taglia (midau)

¹ Deliberai dalla taglia sin tgauns ein:

- a. tgauns da polizia, tgauns da survetsch dils corps da guardias da cunfin e dall'Armada svizra;
- b. tgauns da lavinas;
- c. tgauns per personas tschoccas e personas suordas;
- d. tgauns da terapia-;
- e. tgauns da protecziun da muntaneras;
- f. tgauns da saung.

Art. 18 Scadenza (midau)

³ La scadenza dalla taglia sin gudogn ord la vendita da terren sco era dalla taglia sin ierta e donaziuns sedrezza tenor il dretg cantunal.

Art. 19 Termin da pagament (midau)

² Il termin da pagament dalla taglia sin gudogn ord la vendita da terren sco era dalla taglia sin ierta e donaziuns sedrezza tenor il dretg cantunal.

Tenor art. 35 lit. a dalla constituziun communal ei il parlament communal responsabels per midadas da leschas. Il referendum facultativ tenor art. 32 al. 1 lit. a resta resalvaus. Tenor art. 26 al. 3 LTCTB ein leschas communalas da taglia e lur revisiuns suentar d'approbar dalla regenza cun effect constitutiv.

Proposta

Sin fundament dallas explicaziuns precedentas fa la suprastanza communal las suandontas propostas al parlament communal:

- d'entrar ella fatschenta;
- d'approbar la revisiun parziala dalla lescha da taglia dalla vischnaunca Ilanz/Glion.